

**VENDIM Nr. 705, datë 9.9.2020**

**PËR KRITERET E CAKTIMIT TË SHPËRBLIMIT TË  
ADMINISTRATORIT TË PËRKOHSHËM TË FALIMENTIMIT,  
RREGULLAT PËR SHPËRBLIMIN E ADMINISTRATORIT TË FALIMENTIMIT,  
SI DHE KRITERET DHE PËRLLOGARITJA E SHPËRBLIMIT TË KUJDESTARIT**

Në mbështetje të nenit 100 të Kushtetutës, dhe të neneve 27, pika 3, 48, pika 2, 160, pika 2, të ligjit nr. 110/2016, “Për falimentimin”, me propozimin e ministrit të Drejtësisë, Këshilli i Ministrave

**VENDOSI:**

**I. TË PËRGJITHSHME**

1. Objekt i këtij vendimi është përcaktimi i kriterëve dhe i rregullave për shpërblimin e administratorit të përkohshëm të falimentimit, administratorit të falimentimit, si dhe kujdestarit.

2. Shpërblimi përcaktohet nga gjykata, në përputhje me nenet 27, 48 dhe 160, të ligjit nr. 110/2016, “Për falimentimin”.

3. Në përcaktimin e shumës së shpërblimit për administratorin e përkohshëm të falimentimit, administratorin e falimentimit, si dhe kujdestarin, gjykata, përveç kriterëve të posaçme, merr parasysh kompleksitetin e detyrës, punën e kryer, rezultatet e arritura dhe kujdesin e treguar nga administratori i përkohshëm i falimentimit, administratori i falimentimit, si dhe kujdestari në përmbushjen e detyrave.

**II. KRITERET PËR CAKTIMIN E SHPËRBLIMIT TË ADMINISTRATORIT TË PËRKOHSHËM TË FALIMENTIMIT**

1. Administratori i përkohshëm i falimentimit, që caktohet nga gjykata përpara fillimit të procedurës së falimentimit, shpërblehet me një shumë jo më të lartë se 50.000 (pesëdhjetë mijë) lekë për 30 (tridhjetë) ditë.

2. Në përcaktimin e shumës së shpërblimit për administratorin e përkohshëm të falimentimit gjykata mban në konsideratë kohëzgjatjen dhe kompleksitetin e detyrës, si dhe llojin e veprimtarisë tregtare që ushtrohet nga debitori.

3. Në rastet kur gjykata cakton një administrator të përkohshëm mbikëqyrës, masa e shpërblimit që caktohet nuk duhet të jetë më e madhe se 70% e masës që do të ishte caktuar në rast se gjykata do të kishte caktuar administrator të përkohshëm falimentimi.

4. Në rastet kur administratori i përkohshëm i falimentimit caktohet nga gjykata për verifikimin e shkakut të hapjes së procedurës së falimentimit, sipas parashikimeve të neneve 19, pika 1, shkronja “c”, dhe 23, pika 2, shkronja “c”, të ligjit nr. 110/2016, “Për falimentimin”, shpërblehet në një shumë jo më të lartë se 100.000 (njëqind mijë) lekë. Në përcaktimin e masës së shpërblimit gjykata merr në konsideratë kompleksitetin dhe kohëzgjatjet e detyrës, si dhe llojin e veprimtarisë tregtare të ushtruar nga debitori.

5. Në rastet kur administratori i përkohshëm nuk realizon detyrën brenda afateve ligjore, gjykata mund të reduktojë masën e shpërblimit.

### **III. RREGULLAT PËR SHPËRBLIMIN E ADMINISTRATORIT TË FALIMENTIMIT**

1. Shpërblimi i administratorit të falimentimit përbëhet nga pagimi i një përqindjeje të shumës së aktivitet të grumbulluar (masa e falimentimit në përfundim të procedurës së falimentimit), sipas këtyre kufijve:

a) Nga 10% në 12%, kur aktivi nuk është më shumë se 1.500.000 (një milion e pesëqind mijë) lekë;

b) Nga 8% në 10%, kur aktivi është mbi 1.500.000 (një milion e pesëqind mijë) deri në 4.000.000 (katër milionë) lekë;

c) Nga 6,5% në 8,5%, kur aktivi është mbi 4.000.000 (katër milionë) deri në 6.500.000 (gjashtë milionë e pesëqind mijë) lekë;

ç) Nga 5% në 7%, kur aktivi është mbi 6.500.000 (gjashtë milionë e pesëqind mijë) deri në 13.000.000 (trembëdhjetë milionë) lekë;

d) Nga 3,5% në 5,5%, kur aktivi është mbi 13.000.000 (trembëdhjetë milionë) deri në 65.000.000 (gjashtëdhjetë e pesë milionë) lekë;

dh) Nga 2% në 4%, kur aktivi është mbi 65.000.000 (gjashtëdhjetë e pesë milionë) deri në 130.000.000 (njëqind e tridhjetë milionë) lekë;

e) Nga 1,5% në 2,5%, kur aktivi është mbi 130.000.000 (njëqind e tridhjetë milionë) deri në 250.000.000 (dyqind e pesëdhjetë milionë) lekë;

ë) Nga 1% në 1,5%, kur aktivi është mbi 250.000.000 (dyqind e pesëdhjetë milionë) deri në 500.000.000 (pesëqind milionë) lekë;

f) Nga 0,6% në 1,2%, kur aktivi tejkalon 500.000.000 (pesëqind milionë) lekë.

2. Në përcaktimin e përqindjes së shpërblimit të administratorit, në rastet e vendimit për likuidim, sipas pikës 1, të këtij kreu, gjykata mban parasysh shumën e aktivitet të grumbulluar, numrin e kreditorëve, llojin e biznesit dhe kompleksitetin e detyrës.

3. Shpërblimi i administratorit të falimentimit, në rastet e vendimit për riorganizim, caktohet nga gjykata me një shumë mujore, jo më pak se 50.000 (pesëdhjetë mijë) lekë, të caktuar deri në miratimin ose jo të planit të riorganizimit. Në përcaktimin e masës së shpërblimit të administratorit të falimentimit, në rastet e vendimit për riorganizim, gjykata mban parasysh menaxhimin e biznesit, numrin e kreditorëve, llojin e biznesit dhe kompleksitetin e detyrës.

4. Shpërblimi, sipas parashikimeve në pikat 1 dhe 3, të këtij kreu, do të rritet me 10%, llogaritur mbi vlerën takuese sipas këtyre pikave, në rastet kur:

a) ka më shumë se 200 kreditorë;

b) ka më shumë se 3 njësi prodhimi, në qytete të ndryshme;

c) rasti paraqet kompleksitet të veçantë ligjor, sipas vlerësimit të bërë nga gjykata.

5. Administratorët e falimentimit kanë të drejtën e përfitimit të një tarife suksesi, në përputhje me parashikimet e shkronjës “ç”, të pikës 3, të nenit 48, të ligjit nr. 110/2016, “Për falimentimin”, si dhe me parashikimet e këtij vendimi. Tarifa e suksesit të administratorëve të falimentimit i shtohet tarifës bazë të shpërblimit të përfituar prej tij dhe nuk mund të jetë më shumë se:

a) 25% e tarifës bazë së shpërblimit, kur administratorit i jepet detyra e menaxhimit të biznesit pas miratimit të planit të riorganizimit;

b) 20% e tarifës bazë së shpërblimit, nëse miratohet një plan riorganizimi;

c) 15% e tarifës bazë së shpërblimit, nëse biznesi, një ose më shumë njësi biznesi që përfaqësojnë më shumë se gjysmën e vlerës së masës së falimentimit, shiten ose transferohen si aktivitete që vazhdojnë veprimtarinë.

6. Me vendim të gjykatës, administratorit të falimentimit mund t’i parapaguhet deri në 20% të shumës së shpërblimit total që i përket, përpara shpërndarjes përfundimtare kundrejt kreditorëve të falimentimit, në përputhje me pikën 4, të nenit 139, të ligjit nr. 110/2016, “Për falimentimin”.

7. Në rast të mbarimit të veprimtarisë së administratorit të falimentimit, për shkak dorëheqjeje apo shkarkimi nga detyra, përpara përfundimit të procedurës së falimentimit, ai gëzon të drejtën e përfitimit të shpërblimit, proporcionalisht me punën e kryer.

8. Në rast të prishjes së vendimit për çeljen e procedurës së falimentimit, administratori gëzon të drejtën e përfitimit të shpërblimit për punën e kryer deri në atë moment.

#### **IV. KRITERET DHE PËRLLOGARITJA E SHPËRBLIMIT TË KUJDESTARIT**

Shpërblimi i kujdestarit caktohet nga gjykata, duke iu referuar të ardhurave të debitorit individ në procedurë falimentimi, shpenzimeve të jetesës së tij, si dhe në bazë të kohëzgjatjes së detyrës së kujdestarit dhe kompleksitetit të saj. Në çdo rast, shpërblimi i kujdestarit nuk mund të jetë me pak se 20 000 (njëzet mijë) lekë në muaj. Në rastet kur kujdestari ngarkohet nga gjykata me detyra të posaçme, shpërblimi i tij nuk mund të jetë me shumë se 50 000 (pesëdhjetë mijë) lekë.

#### **V. DISPOZITAT E FUNDIT**

1. Vendimi nr. 197, datë 13.4.2007, i Këshillit të Ministrave, “Për kushtet dhe kriteret e përcaktimit të masës së shpërblimit dhe të rimbursimit të shpenzimeve të administratorit të falimentimit”, shfuqizohet.

2. Ngarkohen Ministria e Drejtësisë dhe Agjencia Kombëtare e Falimentimit për zbatimin e këtij vendimi.

Ky vendim hyn në fuqi pas botimit në Fletoren Zyrtare.

**ZËVENDËSKRYEMINISTËR**

**Erion Braçe**

Botuar ne F.Zyrtare 164/2020

Dale nga shtypi me 14.09.2020